

# mien laid dat vlogt

saul van messel

*gedichten*

mien laid dat vlogt

in memoriam matris

as klain gedicht  
veuraan in mien gedichtenbouk  
doar staistoe moeke  
mit dien schuddeldouk

twievel

mien laid dat vlogt  
hoog in de locht  
fluustert mie tou  
ist hoog genogt

saul van messel  
**mien laid dat vlogt**  
*gedichten*

aigñ aarf - heemstede - 1970

epigram

mien òlste plunn  
dien woordn — grunn —  
dien laider haitn  
mien nijste vrunn

vaarregels

òfstand

mien ik stait bie  
mien laid in t kriet  
mien woord ligt veur  
mor ik wait nait hou wied

òfkomst

zo mor oet sliet  
aan aarme woordn riek  
mit aarmslag wied  
gruistoe aaltied



cultuur

lot mie in mien bedrief  
as boer begoan  
zo laank ik woordn schrief  
oet oerbestoan

talenpracticum

as frans en duuts  
heb ik die in mien buuts  
ainmoal en aaltemoal  
mien toal

pseudoniem

mien aander zulf  
ston zo verfoesd  
dat ik hom vruig  
bistoe verhoesd

winschoot 1920

oele van post  
zaandkoele op gaarst  
wat ik dou wos  
vergait in dizze haarst

melancholie

mien woord snidt in mien vlaais —  
hailndal in toes  
kom ik van minne raais  
mor nait naar hoes

op bozzem

portret van potjewied  
wat laachstoe blied  
wat bistoe dood  
wat bistoe wied

post: holtzoagerij  
gaarst = zaandgrond; buurt in winschoot  
potjewijd: fotograaf oet winschoot ± 1920

veenkoloniën

houminneg moal  
zulfde kenoal  
mor aaltied aans  
as dizze toal

autobiografie

snijblind van woordn  
dij as flòkn vlaign  
oet 't kòlle noordn  
deur mien òlle laider

körtmous

wat dustoe  
mie zeer —  
vrouger  
aal weer

jizker

jizker (jizkor) = hai ~ god ~ maag gedenkn:  
begunwoord van gebed veur doodn

— winschoot —

engelsestroade

mien laid  
doe magel  
in mien hoed  
wèl kin die leezn

de deure  
van mien jeugd  
stait op de gloep  
wèl zol doar weezn

jizker

mien sjoel is blind  
dij zugt gain jeudn meer  
naachts in de wind  
heurt zai gereer

sjabbes

21-2-1970

gedachtn aan vrouger  
aan vrunn' en goud —  
bloumm mit stingels  
in voazn vol bloud

verstoppertje

kiek eevm opzied  
zegt mien woord tot mien laid  
din zugstoe de tied  
en hai zugt die nait

folklore

hai kleurde hier nait  
hai bleef jeude

— jeude jeude  
wat joekt mie de neuze —

hai vruig aan deure  
mok oopm as t kin

— ast gain jeude is zee aine  
din komter mor in —

en hai kwam nait  
veur joe gain neude

hai kleurde allain  
bie swaarde jeude



valkenjacht 1942

ainteuneg as  
zien stadskenoal  
is mien twij  
doezend joar verhoal

van soamel vaalk  
zien hoar waas swaart  
wël heurde klokslag  
van zien haart

dou hai veur t lèst  
in stadskenoal  
mitspeulde in dit  
old verhoal

deur t roam

ik heur mien moeke  
braain

zo scharp vuil ik heur  
praimm

dat vingers woordn  
graimm

boudelschaidn

veur pabbe

dien talleszak

van gruïn fluwail

heurt bie mien dail

hai zugt slim koal

dien talleszak

ook in mien toal

mit aign bloud

vaarw ik hom rood

aans gait e dood

nou gruit hai gruïn

mie zo weer tou

en k wait nait hou

talleszak, waarin t bidklaid = talles wordt bewoerd

haardbrood

maistieds wait ik  
mie zo dichtbie  
dat ik noa schoultied  
weer goa speuln —  
bie rensel laangs  
bie euliemeuln

moar as ik din  
in haardbrood biet  
bin ik mien  
aign tann  
kwiet

matthäuspassion

— boetnstoander heurt bach —

bie t swoare koorn  
heurt ook pluus

hier is mien deure  
doar mien sleudel

hier lign noagels  
doar stait t kruus

ook jesus christus  
waas ôl jeude

westerbork

zunschien en haarst  
op blaauwe haaide —  
ik zèg joe t gelaaide  
aan: allebaaide

— doe akker in t zoad —  
priapische poëzie

vlam

liek as n keers  
dien lief in mien hann  
ik vuil doe verteerst  
as wie baaidnt verbrann

hooglied

— waarom nait oet t hogelaand —  
zaacht en helder  
doe bist mien kwelder  
  
en doe bist mien diek —  
liek is riek

kruusroadsel

op weg noar mien hoes  
verdwoalst in mien hoar  
mien kruus is kroes  
hier is dien spoor

coitus

het anker lös —  
twij widde tjaalkn  
mit zailn bol

wèl heurt deur  
t stinn van de wind  
heur laifde blind —

twij tjaalkn in  
dij smale bocht  
onder de wiede locht

post coitum

wat heb ik vertèld  
as ik die verloot —  
doe wèl in mien vèld  
doe akker in t zoad

priapos 1925

pampier: dien lief —  
ik waas die ink en pin

nou ik dit schrief  
woar gingstoe hin

wie baaidnt speuldn  
cp braide baank

ik haar nooit heurd van freud  
mor hai beston al laank

blijhamsterweg 1926

ittjebijen / aalbeerns  
vrijen onder steerns —  
gedachtn dijen —  
krudoorns / ittjebijen



noagewas

groteske

binn de heege  
van mien meneuvels  
vuil ik glaad ies  
onder mien scheuvels

moar veur ik verzoep  
bin ik hail wies  
lèg ik as jeude  
baalkn onder t ies

dörst

veur jan niehoff

mit kloare toal  
doe wiede wad  
zoep ik mie  
aan dien kwellers zat

en mörgn vroug  
mit nöchtern lief  
begun ik weer  
as ik dit schrief

pont neuf

veur simon

paries en stadskenoal  
in ain gedicht —  
is dat brutoal?

nait veur van messel  
dij de seine zugt  
mit badde oet  
van wattums moudertoal

derk sibolt hovinga

op zien 60e joardag

de muzen bliedm wakker  
de boerenploatsn sloapm

het woord gruit  
oet de gruine  
akker

en wordt woapm

gain weerklank

gedicht mien lust  
mien woord bevrust  
sikkeneureg en sneu  
waacht ik op deu

veurzörg

mien lèste bundel  
dou k op grundel —  
nog ainmoal boas  
op aign aarf  
veur dat ik staarf

— drijloek as outlook —

gebed

dij wiezer draait  
mien leevm vòt  
lòt mie mien laid  
nog eevm gód

doodstiedn

zaacht fluustert de dood  
woar blift de tied  
verlaangst waas hail groot  
nou ist zo wied

epitaaf

as mittertied ook dit verstaarft  
gain jeude meer van jeudn zingt  
din blift van mie vaar regels staark  
mien zaachte laid as stainen zaark

òfschaaid

veur t allerlèst  
zugstoe dat nait  
doar zit de wèst  
daip in mien laid

## *inhold*

twievel	4
epigram	6
<b>vaarregels</b>	
òfstand / òfkomst	8
cultuur / talenpracticum / pseudoniem	9
winschoot 1920 / melancholie / op bozzem	10
veenkoloniën / autobiografie	11
körtmous	12
<b>jizker</b>	
winschoot / engelsestroade	14
jizker / sjabbes / verstoppertje	15
folklore	16
valkenjacht 1942	17
deur t roam	18
boudelschaidn	19
haardbrood	20
matthäuspassion / westerbork	21
<b>doe akker in t zoad</b>	
vlam / hooglied / kruusroadsel	22
coitus / post coitum	23
priapos 1925 / blijhamsterweg	24
<b>noagewas</b>	
groteske / dörst	26
pont neuf / derk sibold hovinga	27
gain weerklank / veurzörg	28
drijloek as outlook	29
òfschaid	30
	31

*colofon*

dizze

mien daarde bundel in t grunnegers

verschient november 1970

in n oploag van 100 exemploaren

nummerd en taikend

deur de dichter

veurtied wörn oetgeevm

bie van der veen in winschoot

vrouger of loater 1969

twijspaalk mien bloasbaalk 1970

hemstede

haast 1970

van messel

dit is nr. 2